

Nois Läbe

Es Chnöschpli blinzlet d Sunne ah
Erwacht im junge Tag
Laht ds Winterchleidli gärn no dra
Wöu ääs nid frühre mag
Lang wird äs nümme warte
Leit ab sis Chnoschpegwand
Wirds da zum Bluemegarte
Dr Früelig zieht is Land

Lueg wie schön chas nid beschribe
Nei das muesch ganz eifach gse
Öberau fahts afa tribe
(2x)
Winter gäu chunsch nümme meh

Jodel

Jetzt scho es Blättli gügget scho
Es het mi nid nur tüecht
Und öberau e andere no
Ganz zart im helle Liecht
Es Wunder isch im wärde
Nach Schöpfer Art und Wiis
Baud isch uf üser Ärde
Es blüigs Paradies

Lueg wie schön chas nid beschribe
Nei das muesch ganz eifach gse
Da vergeit doch jedem ds Hiibe
(2x)
Und ou bräschte döi nümme weh

Jodel

Nöis Läbe lacht mi fründli ah
Und grüesst die grossi Wäut
Da fahni grad mit singe ah
Äh jutz zum Himmuszäut
Und la mi stöu verwöhne
Vo au der Farbeprecht
I aune schönste Töne
Das het dr Herrgott gmacht

Lueg wie schön chas nid beschribe
Nei das muesch ganz eifach gse
Da chaisch nümme im Stübli blibe
(2x)
Singed mit us Freud juhe!

Jodel